



國家清史編纂委員會・文獻叢刊

清代詩文集彙編

國家清史編纂委員會・文獻叢刊

清代詩文集彙編

《清代詩文集彙編》編纂委員會 編

上海古籍出版社

清代詩文集彙編 六五二

晚晴軒儷體文存二卷晚晴軒詩存五卷 陳文田 撰

一

荔雨軒文集六卷荔雨軒文續集二卷荔雨軒詩集三卷 華翼綸 撰

五七

九梅村詩集二十卷 魏燮均 撰

二〇一

六安大司馬遺集不分卷 涂宗瀛 撰

三六七

坦室詩草不分卷 恩霖 撰

三九三

金壇圍城紀事詩一卷 于桓 撰

四一三

槐卿遺藁六卷附錄一卷 沈衍慶 撰

四二三

花事草堂學吟一卷 蔣光煦 撰

五〇三

曾太僕左夫人詩稿合刻十一卷（吟雲仙館詩稿一卷冷吟仙館詩稿八卷

詩餘一卷文存一卷）附錄一卷 曾詠 左錫嘉 撰

五〇九

蒼菊花館詩詞集三卷（詩集二卷詞集一卷） 徐鴻謨 撰

六四五

小醉經室詩集六卷 徐廷珍 撰

晚晴軒儷體文存

蓋平姚正鏞署



小序

高談古文卑視儷體久矣余不求高姑就卑者學之初讀徐庾集夸麗炫目繼讀文苑英華益莫測其涯涘最後得小倉山房外集卷施閣乙集讀之乃稍稍有所領會竊念古文之所以貴者理也法也氣也儷體文字舍是三者又烏足言然鎔裁聲律高下相須前賢盡之矣若夫悵悵述情沈吟鋪辭爰有風骨發爲神韻引而伸之是或一道也戊午初秋供職薇垣殫竭思慮妄希撰擬改官以後作輟相尋顛毛種種知無進步乃檢敝篋存若干篇付諸削氏就正有道後一卷皆頌禱之辭大都乞米帖也棄之可惜附次於後桓譚有言凡人賤近而貴遠親見揚子雲祿位容貌不能動人故輕其書丁敬禮又言文之佳惡吾自得之後世誰相知定吾文者邪牽連書之以俟來哲光緒辛巳冬十二月祀竈日江北陳文田識於都門宣南坊之晚晴軒

晚晴軒儷體文存

晚晴軒僊體文存卷一

秦州陳文田硯鄉

宋惠人邦德同年祥刑古鑑序

夫徵三典者祖元公之書陳九瀾者宗鄒侯之律厚德隆俊用濟以王鈇宵人懣惑或罹於國網繇是典文者高言霜准畫諾者罔知雪活銖杪之罪勢於李唐之衰薪粲之罰邈乎炎漢以上其有決獄二百事規仿春秋駁議三十篇鉤稽板令蓋刑中之極軌亦法外之宏仁也宋君惠人才高法家職司秋典經言外言之策恥道其權謀三覆五覆之章務期於奏當猶復憂慮驚髮戒

晚晴軒僊體文存卷一

切師心博采羣言都爲一集以田同志開示大凡田惟

經訓者張湯之傳古義也格言者陳寵之比辭訟也事實者馬援之存故事也自西京之律不傳而長孫之疏特著用是布留司之格諸曹守其金科進獄官之箴法吏資其藥石然而蔭或疏於夏槌制且密於秋荼罔惜楚痛之聲第矜周內之巧治原寢失刑辟滋多夫執法者司憲之大綱好生者皇人之濶網呂覽之訓審斷必示正平荀卿之言禁析首分愿悍匪枉獄以鳴陰德當順時以召陽和若是書者信乎副欽靜之忱致亭疑之美矣在昔魯公疑獄之集粗舉其端亦越桂氏比事之

編遞沿其例今之纂述略與同科而增加發明倍形矜慎田識慙窺管志切引繩附參酌於雲司得津梁於日下讀書讀律幸致身於

堯舜之時在官在朝願共體平皋蘇之意

朝鮮李友石豐翼尚書詩序代張午橋編修

昔玉谿生以崑體之宗稱晚唐之傑碧城錦瑟曲寫其纏繚瑤池漢宮旁通於諷諫效優孟者或來祭獮之謂思美人者謂有沈淵之忠自荆公直扶其藩籬與杜老相孚於沆瀣千載而下誦楚雨含情之句未始不歎爲曲江遺憤之詞也若友石尚書其殆取徑樊南抗懷憂

晚晴軒僊體文存卷一

府乎丁卯之春友石以賀正旦朝

京師余讌之於城南龍樹禪院觥錄初行筆談間作推襟送抱綴羽緝商因出示所著詩草余受而讀之見其鍊花爲胎驅雲成采洗大歷貞元之習駕飛卿柯古之先與玉谿生有同調焉顧惟玉谿生籤記河陽萍浮嶺表黃昏封印低眉觀察階前佳節開樽雪涕郎君閨外宜其興離思而隨溝水賦無題而指蓬山摠情遙屬於蹇脩結體多同於小雅若友石者涵濡聖澤弼輔名王職宗卿之司副賓將之任飛翰贊事懷德作歌這當勝趙清平之侍游近亦如權秀才之應制

顧何以睠懷芳草蓄素微波仿楚些之申言恨鄭箋之
不作者松柏之性自成礪硯冰雪之神宛焉淖約三
年江海欲迴天地於扁舟六國樓臺浪託綺羅於宮闕
其於梁園舊客心鄉往之得毋與草堂老人相視而笑
乎會病叢茸未弁一言今抒昔誠達之左右梅花清冷
暫當驛使之春東海蒼涼如聽水仙之操余與友石情
深於命駕誼切於通辭異日者吟水天波月之聯附沙
鳥山雲之後不令島佛專美有唐抑又余之所膏蘭以
祝者已

錢子諒前輩曳月樓曝書圖前後記序

晚晴軒僊體文存卷二

三

慧山之麓有李公讀書之堂梅里之鄉得倪迂藏畫之
閣巖岫珍其香草湖泖盪其春華以故魚肖絃徽鳳無
凡采筆賦之外流傳於顧癡選學之精眷懷於尤槩子
諒先生得文峰之筆服方池之連賦詩雜以仙心味道
美於禪悅挂腹者五千卷插架者三萬籤濃香可熏清
芬斯在滿簾之積不如一經曝書之期粵惟七夕第其
甲乙副以丹青蓋漁獵於圖史寢饋於綉素歷有年所
矣當士衡入洛之日正臣朔上言之初慘綠年華畫黃
公事五字之敏陶以性靈六押之長邁於儕輩每直紫
微香早白矜涼生時敬闕而觀書或當階而得句猶復

摩挲塵笈眷念家珍聽到晨春歸夢梁鴻之宅攜來團
月相思陸羽之泉此一時也既而吳苑為墟楚氛不靖
舉烽望亭之市立馬夫椒之山甲帳珠簾燐飛滿地牙
籤玉軸羽化成煙則又動索米之愁堅買山之約栖杜
陵於同谷老庾信於江關猶且馳睇吾廬愴懷故紙琴
當碎後賸有哀絃硯是焚餘都難潑墨此又一時也夫
莊生作達始悟齊物之旨太白宴遊迺有逆旅之感漢
書沿誤誰問胡盧繭紙何存空悲松柏以至絳雲舊籍
汲古殘編或遺燼於雷回或埋塵於質庫皆雲煙之過
眼豈金石之常貞矧吾人目盡圖書心超鍊冶寶百辟

晚晴軒僊體文存卷二

四

之劍成九還之丹夜雨三更酌水仙以尊酒天風萬疊
諧禽鳥以宮商當為河岳之英靈奚取古人之精魄今
先生朝衫暫脫游屐方勞負堅白之操誓廓清之志傳
介子棄觚而歎不事散儒王處仲擊壺而歌何慚烈士
行見磨墨盾鼻鍊句矛頭殲醜類以靖江波恢名城而
瞻鄉樹桃花十里重尋盤陽之春雲葦雪一蓬更汎蠡
湖之秋月其亦可以奏從軍之樂副衣錦之華矣乎吳
日者名立而宦成學修而德劭園焦之宅丹雘一新埽
葉之編鉛黃不斷名山能占在徐塘葛垓之間故劍重
收軼宋槧元鈔而外取是圖而張之抑亦可悟雞蟲之

得失參花葉之因緣也

重脩揚州新館記

揚州孕淮海之靈爲人文之藪禹筵充衍達於京師館舍都麗遂冠日下高郵寶應興化泰東臺地去郡遠才實代興綜合羣力別創新館公車待詔之士迺有定居素絲退食之臣于焉廣益鄉先生之德澤古橫舍之遺規美矣盛矣軍興十載東道睽越輪軌罕至膳笈蓋寡同治丙寅王君補帆觀察兩浙入覲於朝慨然思繼王文簡公朱文定公未竟之緒請諸節相獲以鹽籌再新斯館屬與夏君路門董治其役先是

晚晴軒僊文存卷一

五

道光壬午歲式廓東院己亥歲補葺南楹規制特備法意良美謹循舊條不敢改作高閑閑以迂春生之氣展堂筵以綏神聽之和精廬鱗次各游其天髹器光潔不窮於用告成之日鄉人愉愉桂林一枝祥雲五色百福來會蓋無既極夫王相之術儒者不言景行之私風人載詠昔之範模蘇李入十五子之詩編枕肱春秋補二百年之長麻通雅訓者力宗乎兩漢搜逸文者博涉乎三蒼膏馥長留精神不沫今也流連庭樹側聽琴絲聲欵前脩韋弦同調日時習禮務爲方領矩步之容遷地皆良毋負東箭南金之美若夫杜陵之廣廈白傅之大

裴清可潤蘭暖於吹黍後之君子儻飲水而思源抑亦當見山而累由也是役也經始於丙寅八月畢工於丁卯五月凡用白金四百有奇

顧亭林先生祠雅集圖記

慈仁寺當都城之兌隅爲普門之香界亭林先生以康熙戊申徙襍其內飛鳧半載遺跡千秋自何君子貞拓隙爲祠潔芬以薦三時遞舉清風穆然歲躔著雍初夏三日子年前輩練貞辰之歌補上巳之禊彫禾節竿孔蓋在庭退而飲福以洽朋酒自椒生尙書以下集者凡十四人於時丈石當階雜花生樹毘盧之閣鐘聲遠聞

晚晴軒僊文存卷一

六

西山之雲晴色到檻上壑聚於遐想絲竹代以清談誼亭農部小鐵舍人析別爲圖亦濡筆以志其盛夫尊疊璀璨北海詫其風流裙屐翩反西園珍其夕賞降至圍燭成列翦筒作盃大都貽花蕊以煎酥賭壺臬而角技况復金門待詔粉署含毫縮塵著衣素絲改色酒酣耳熱心蕩於蘭塗劍舞歌呼目窮於麟閣問靈臺其孰寄指歧路以何之卽或愛竹成癡據梧自得踏芒鞋而選勝支印杖以忘年登幽州之臺愴然涕下入東林之寺邈乎離塵風景不殊瓣香安在而欲延方聞之士發思古之懷脫略高蟬從容翕羽過夷門而太息侯生在

焉止箕山而不行許由逝矣展車服者盍瞻諸坐右聆金絲者或得之壁中若子年前輩其殆綜大雅以扶輶借初桃而示覺也乎抑更有請焉孝爲仁祖管仲父之至言也經爲人師伏司徒之懿則也昔者雲雷甫判承遺訓於貞姬邊塞重游覃奇思於太史日知著錄博學逃名鍾阜云遙章丘將老是以關中知己流連古寺之羹浙水才人悵寥天之鶴今也莫如師禮侑以賓筵毋炫美乎雅游毋移情乎真率雙松在望共此歲寒老佛鑒之匪耽禪悅後有作者當續天下利病之書尙論古人試觀

晚晴軒儷體文存卷一

七

國史儒林之傳

壬申秋祭顧先生祠記

同治十有一年九月晦宋學士晉暨同人集顧先生祠秋蔬盈握清泉一樽奉南豐之瓣香致西山之爽氣於時雁臣來賓隼旟出祖凡百執事罔不祇恪旣徹而燕迺脩題名故事桐柏侍祠之屬例書其爵蘭亭修禊之序繫詩以人禮也惟樂公立社戶祝於鄉石相建祠化行一國若規鴻都而置學崇布衣而饗德繇歷千禩省乎不聞至如購柳誠懸之書標題貨貝辨白香山之句增價雞林亦或名滿寓內風動區外然而單于求見

魏應代之同紇懽呼郭公尙在求其馨香百世膜拜一堂往牒具存未之有也先生暫游遼左遂返章丘非如卓帽之長行已共青山而終老而迺歌謠伯起爭譏關西憑弔成連移情海上履綦雖沫弦誦如新葉語至今象來致福美矣盛矣蔑以加矣於戲體大思精宣城之作山高水長嚴陵之風登斯堂者慨慕高冠流連禮器毋徒託於北面弟子而自夷於西家愚夫也是日與祭者宋晉周壽昌楊寶臣徐士鑾張師劬汪元慶吳大澂孔憲穀徐炳烈黃貽楫戴燮元顧懷王董文燦馬紹訓孔慶輔邊保極王應孚高其操文田暨弟文霽外臣與

晚晴軒儷體文存卷一

八

祭者朝鮮判中樞府事朴珪壽嶽卿戶部侍郎成鍾鎬敘齋宏文館校理姜文馨蘭圃璫卿於咸豐辛酉謁祠星一終矣復來與祭亦盛事也時徐君苑卿出守天台張君念慈亦以太守赴中州需次卽於是日祖道并識之

龔叔雨自閩廷平重臨壬戌同年雅集圖記

右嘉慶壬戌同年雅集圖龔叔雨廷平重臨華陽相國本也慈恩曲宴恒往復於題名先人清芬或貽則於來葉悵鐘有不盡之烈藁史多未成之篇圖畫丹青於斯爲盛昔者秘書之校昉於臣向瀛洲之象隆於有唐我

朝因之特崇是選王戌一科超軼前後虞褚並出炳蒼
昊之靈蘇李同時掌紫微之誥勳德兼茂聲聞粲然華
陽相國作圖於道光辛丑距王戌蓋四十年上清舊侶
已似晨星慘綠少年都成商皓推襟送抱換羽移宮晚
節花香春夢夢熟今叔雨復臨是圖攝李摹之笛重按
霓裳裁韓偓之詩不慙老鳳珍重口占之句師有六截句系於圖
後流連手澤之貽距辛丑又三十年矣田以菲材受文
恭師知貢於太學憶戊戌如月謁師於豔雪軒座有春
風門多秋駕筆花散采酒雨橫飛維時叔雨甫越觸辰
已露若頽虎氣騰上龍文不凡今則脫屣通侯持衡國
九

晚晴軒體文存卷一

九

憲腕能潑墨鬚亦如銀而如田者獻冰柱之詞負立亭
之望蓬萊煙霧阻太白之仙游文武衣冠觸少陵之秋
興平原不見空抱繡絲吳苑流傳祇存團扇三復斯卷
不知涕泗之何從也

謝朝鮮李石坡

是應

大院君惠東醫寶鑑啓

春中由石山宗正所獲瞻畫象謹貢小文染管襍飾未
足名狀迺奉賜書綉細已甚蕭相國韻若畫一心焉儀
之曷大夫鏃然不滿於茲信矣田遇同顏駟才謝江淹
年髮已秋風塵未盡從容魚樂時寄興於濠梁宛轉琴
徽復移情於海上承惠東醫寶鑑全表生坤之柏醫國

未能散社之酒治蟬粗足木瓜投我助成錦段之相思
桂樹招人牽引煙霞之痼疾攄臆奉致藉賞良艷咸寒
增厲伏希與時節宣不具

募建閭潛丘先生祠疏

石渠故事攷五經之異同貞觀詔書增諸儒之配饗山
東友教是稱大師河汾云遠邇崇私謚高山仰止中心
藏之湖道光甲辰之春柳亭林先生之祀道州首倡羣
公響應相方作室與佛為隣禮儀既成觀者永歎伏見
潛丘先生洽孰經傳窮治古訓北方學者未之或先天
下文章莫大乎是昔顧先生遇先生於京師出日知錄

晚晴軒體文存卷一

十

相質經其裁定隨時刊正三年一昉已有並席之懽二
人斷金遂成同心之臭譬諸太華少華各極其高比之
疊尊儀尊互呈其實今者崑山來格太原不祀肆將之
次蒙竊惑焉詩人廣大敢存宗唐祧宋之心祭法謹嚴
當從先河後海之例顧祠地南頗有曠土庀材召役疇
曰不宜開土五百弓地足借一枝京曹四萬俸錢祇供
半勺圓依祇樹流連布金室是書倉從容墨石兩賢當
相視而笑諸生可習禮其間伏願八駟貴人三世司業
宏假津筏助成傑構或分鶴料出自廉泉或頒彝器用
銘德善尋經師授受結香火因緣凡擲米之神仙皆升

堂之弟子於戲歲寒增厲請看禪院雙松遺像清高豈獨雲霄一羽謹疏

刑部重脩文昌廟土地祠碑

懿夫文明有象占星兆東井之祥地道無疆作維展西方之社歲周甲子長戴天樞位在庚申克均土德况復珠暉朗潤潛銷貫索之光芒金氣流行早靖圖扉之沴厲神所勞矣禮亦宜之稽憲部之鴻規本錦衣之故址庀材作室雲構崇閎弼教明刑

天題炳耀大堂之左有文昌廟三楹南向迤西有土地祠三楹東向創於勝國之中葉逮乎本

晚晴軒僊體文存卷一

七

朝而加隆兩地明禋千秋貯靈歲月絲邇構櫺寢彫執事者勿魯爾儀觀禮者或議其褻矣夫虞書五用報咎絲之功漢律九章崇鄼侯之祀西阿占夢則髣髴刑神北寺升香則抗懷賢者若夫司中司祿之掌垂象戴匡樹松樹柏之宜辨方敢位義無關乎頌繫禮曷取乎禱祠然而

帝德同天

皇猷襲地宏開文網滋育坤元奏當之制甫頒除苛之頌競作

天子察於獄麗太史司寇職其成小臣來自田間庶人

在官均其祿讀書萬卷迺知律令之用中受地一塵共懷科條之罔外凡百君子及羣有司疇弗光昭國華謳吟富媪也哉邇者連櫺藻繡半蝕於旁風度閣尊疊恒虞其漏日石壇花落薛壁霜寒田等踐白雲之司拜明神之祐尊王鈇而奉職敢告皇天指名士而刊章有如后土願分鶴俸遠踰祇園之布金相戒鳩工奚假海靈之雕畫經始於光緒某年某月告成於某月重門洞達貳室綸連翠葆盈庭蠡杯在枝雲車風馬靈之來兮椒醕蘭膏昭其敬也當璆縣之始犴獄胥平及華火之傳鵲巢無恙於戲時逢

晚晴軒僊體文存卷一

七

文治爭看八座之台暉國有祥刑散作五行之秀氣

誥贈資政大夫六品銜貢生蔣君合葬墓表

在昔力田之選西京美其劬農通德之門北海欽其隱曜郭林宗之鎮雅俗危言不聞沈麟士之賦元散清風斯在軒朱卻影卧名於家粉榆載陰有功於社君諱文海字龍泉號粹川粵西鬱林人也元公展繡裳之裔偕凡伯而分封上將借黃鉞之靈與鍾山而同壽世有令德不隕厥緒祖聖樞贈資政大夫父神駢國子監生贈資政大夫並能寶璞守素深根俟時躬脩大雅作則來葉君承靈鞠之後而尙氣骨當文彊之年而執苦勤連

枝寡儔獨爾易竭春鳧秋雁手進一盂黃橘紫筍旁求兼味舞衣博老人之笑番髮露嬰兒之色雖復學富千蹠字直百金拔戟成隊縣布可繼而登山見雲輒虞愛日之短鳴鹿歛雅不如白華之潔彼奉檄而喜者移於外絕裾而去者恕於中聞君之風能毋滋惡泊乎參朮嘗徧伴寢帷之鐙火松柏長成耐臺廬之霜雪雞骨將殆良朋色變鳩巢在側途人稱異嗚呼古之孝子何以加焉若夫礧聲清越女嬃不解罍予篆法流轉阿買復能識字夙敦杵臼之雅指困相酬初算魚蟹之租燔券便了黃叔度遠去貶吝許文休善同饑寒以茲參列庶

晚晴軒僊體文存卷一

三

幾勿媿君懷抱玉質裁斷銀手占察捷於靈書綢繆先於陰雨八方疏濶馴致燕幕之危萬堞荒寒將開螳附之隙號召徒役不虛金擲排比樓櫓遂如鐵鑄已而在蒲扇虐猱噬人大旗日落孤墟煙斷又復任三老之長督一鍾之粟矛頭浙米箱車作陣晉陽月下聆清歌而解甲淝水風前傳唳鶴而卻走當是時渴賞之士推鋒之材竹帛相耀貂蟬立致君顧晦匿名跡遠辟權執恥如卜式之買爵竊慕魯連之高義羲皇以上委懷琴書同賜之徒不稱官閥嗚呼上德若水善行無轍君知之矣神明未衰風流遽逝少微晨霞帶草夕悴咸豐十

年二月初二日卒於寢次春秋七十有八仙龕迢遞家人疑其羽化石室空明謁者神其畫象哀哉正室梁孺人贈夫人側室馬孺人以子武琛貴余孺人以子武琚貴亦贈夫人並有令儀善相夫子稟訓內則爭輝彤管馬夫人先君卒梁夫人余夫人俱後君卒合葬於州之米粉村合璧山有道云亡會葬之車千兩先賢不作墮淚之碑百尺高山宛在古月鑒之子二人武琛同治甲子舉人刑部郎中武琚吏部註名知府孫十二人曾孫十人長君與余同官以行狀來告余爲舉其大端俾之碣於墓門而表之如右

晚晴軒僊體文存卷一

四

橫州學正李君斐齋墓誌銘 代萬藕船宗伯

君諱善章字公材號斐齋姓李氏西粵北流人也潛江靈淑毓秀蟠根左衛異等參華戎胄始以西征開府繼以僑流縉籍曾祖維寧有聲庠序遽毀光采祖治亮起家乙科配食縣社父敏瓊青衿養道考槃自怡並能履和抱冲相金質玉表清脩於里鄰覃仁風於後昆君瞻合不羣夷妬其性忠順弗失三復孝經道器游衍旁通中說方其蹀躞文囿照燭藝林味左思詠史之詩覽江總修心之賦雖復長卿壁立武子油盡而雙魚之札來自這方四時之衣集於維下粵惟伯氏實用玉汝以故

饋貧有方食字而化倚馬日試一軍皆驚連車問奇流水相屬道光甲午舉於鄉天衢案轡將陟聞風之顛元池合樂誰挹浮丘之袖王粲入坐倒屣爭迎劉蕡下第汗顏者眾縣布再上而弗媿迷陽曲行而不屑遂謝舉主願就儒官得授橫州學正於時南陔蘭少北堂護悴春暉夢短秋風思起三尺之檄與手版而俱棄二寸之魚薦冰匣而亦樂甫絮語於申旦倏露零於俄頃自非望雲弔影噓指通誠胡能臻此服闋仍除原官古辣之水用祀先賢海棠之亭時聞文謙儒林尊爲祭酒經生服其方聞都講初嚴傳烽猝至承官文書之戒日兼鄉

晚晴軒儷體文存卷一

五

三老之引領迺召諸御爰樹歸旆橫刀磨盾馬上若飛警枕吹鞭軍中皆慄卒能夷羣醜而草薶復名城而雉列

天子嘉乃鴻伐懋以上賞

賜孔雀翎晉同知銜影纓文繡焜煌侍中之飾驥足騰踏雍容別駕之次恭逢

覃恩晉封中憲大夫雲書稠疊天膏優渥顧乃捥敬作鑑卧名弗居在山泉清出岫雲懶賢哉二疏之知足五柳之樂志也許子將刻勵名節過者單車王彥方從容里居時傳遺布喝人中熟思借樾蔭後進投贊都成翹

秀游於鄭公之鄉若在無懷之世老氏曰上德若谷莊生曰與物爲春君其有焉胡天不弔哲人云萎芝靈罔效玉含竟去以光緒二年四月十四日卒於寢室春秋七十有四仁粟載道路人爲之失聲遺絃在軫諸生於焉制服子士瑞進士國子監監丞士琮國子監生士瑣國子監生士琦舉人景山官學教習皆先君逝士瑣進士刑部主事孫文鈞文銑文鏞士現出余門下將歸治葬特來乞銘嗚呼吾言無媿當推郭有道之碑茲石不渝奚翅范長生之壽銘曰

晚晴軒儷體文存卷一

六

郎有秩仙能著書靈飛秘笈君抱仙骨嫻嫻其來曰福曰慧曰德曰才亦官亦隱亦文亦武員規方矩咸得其所以月非月識君前身如圭如璧相君後人句漏之砂鬱林之石栽栽佳城永安其宅

恭擬

御賜鄒壯節碑文

朕惟志在馳驅終杖蘇卿之節功成戡定追崇羊傳之碑氣作河山列於銘饗爾原任廣西巡撫鄒鳴鶴名高日下勇自天生始由花縣以呈才旋歷茨防而奏績專城責重五遷作鑒於殷邦內史風清三輔化行於夏甸

荷

先皇之特簡俾開府以宣勞百粵縱橫許以便宜行事
一生謹慎豈同微幸成功惟螳封多旁出之虞故蚊負
有難勝之任尋以疆臣上請軍府需才激厲鄉兵支持
窮寇雖無官守有血氣者尊親誓與城存效仁人之授
命何慚壯節用復階勳於戲碧血蒼涼灑鍾山而不沫
青琅璀璨共皎日而長新寶此豐碑永爲世守

恭擬

御賜鄒壯節祭文

朕惟疾風勁草聿彰忠藎之忱會鼓傳芭爰重春秋之

晚晴軒僊體文存卷一

七

祀維其嘉矣實式憑之爾原任廣西巡撫鄒鳴鶴風骨
高騫循良卓著桑田蔭廣則萬口謳吟竹槌波平則兩
河底定暫試豐城之劍遂分京兆之符廷臣旣交薦牟
融

先帝亦心儀李勣畀之方任飭我戎行於時盜弄潢池
軍興桂海當圍師之闕告厥成功膺專閫之權不從中
覆雖偶干平吏議實無愧於臣衷嗣以疆吏上言老成
足恃簡鄉兵而抗敵誓江水以同仇身作長城堅與存
與亡之節詞留絕命志全終全始之心旌旆光寒衣冠
羽化於戲鞠躬盡瘁而後已臣子之大經以死勤事則

祀之國家之令典爾其昭鑒長此歆承

祭李斐齋先生文

嗚呼過東山而瞻俎豆如游金粟光中覽全史而攷公
卿豈止恒河沙數繁榮榮之樽木類落落之晨星馳睇
中區扶輪大雅官惟執戟臣朔是大隱之流業可下簾
君平乃識時之彥此則上珍不賞抱和璞而傷神知已
長辭撫牙絃而輟響者矣恭惟斐齋先生南州望族西
粵名宗家守韜鈴世貽紺素采寒山之橘飽噉天漿鍊
句漏之砂親窺丹訣以故振棊按式之象出辰入參之
祥生枯起朽之方損東益西之術靡不精穿空石手探

晚晴軒僊體文存卷一

六

元關鄉令御風而行則一日可當十駕拓弦而出則七
札能洞五重陳仲舉有屋荒蕪豈甘待客劉越石貽書
親故恐著先鞭渾金之品自高隱鵠之翔有日而迺習
諸生之禮壁水初游呼孝廉之船罌颺屢卻東歸亦可
難求花樣之工西笑無因自領首盤之味先生之得不
形色失不繫心於斯見之矣况復樹背謔華漸傳秋信
當階蘭葉易失春陰鱸日集而匪榮烏夜啼而亦警冰
魚網得能申一夕之歡墓鶴飛來同守三冬之雪雖古
之陳情共命骨立銜哀奚以過之當鄭虔繫馬之時是
柳州結茅之處方將修橫舍摹石經染之以丹青風之

以瓠葉而故鄉書到傳箭同驚長吏符催歸轅徑駕六
千君子遂興構李之師三十須臾已破晉陵之壘設令
任專圻父力翦妖徒木柿奚慮其蔽江樓船早看其下
浦則受降功大峙如河朔之三城畫象名留高列褒公
之一座而迺告身乞得僅博空名健飯如常竟遺此老
豈得不為先生惜哉然而腰支已嬾乞米何為茶具粗
安浮家亦樂屋梁寂寂著作喜其等身某局紛紛功名
付之兒輩譬仲長統之微風為柂如左太冲之丹葩曜
林而况壺士待餐敬門相屬故人有子著帔可憐石壕
之吏不來香山之裘都盡美哉先生之壽及三族神棲

晚晴軒僊體文存卷一

五

九元也胡恒幹之無憑占靈氛而竟逝海山渺矣或結
想於仙龕講幄依然時興嗟於梁木一朝風燭庚開府
長此傷心千里素車范巨卿聞而會葬嗚呼誰為執簡
在儒林文苑之間我誦招魂代華酌瓊漿之薦尚饗

公祭朱師母許太夫人文

維同治六年十月庚辰朔十四日癸巳門下士 文田等

謹以甄羹樽酒敬薦

誥封一品夫人朱師母許太夫人之靈嗚呼坤道含章
以時貞吉淑慎爾止勿讐于室珩璜其音樸樸其節博
稽彤史鮮如此德夫子謬謬中立朝端貞士嚮風壬人

弗安高明燭之感莊矯桓佐以春日保茲歲寒
涌海水壁立高牙倒偃豐貂潛匿義我丈夫夢
爰及姬姜毀妝而逸譙國之詔夫人之城丘
鐘自鳴毋為蓬轉毋為艾榮相我夫子家國以平天子
寢疾矢以身代箕星夕實梁木晝晦備絜金隨長
佩中心銜恤外治不廢未亡偷息覺此孤東以
訓以詩書宜爾家室稟成于姑誰謂甘齋得如苦茶人
百其嫩天錫之福機聲鐙影藥鑪茶麓井無一波金有
半粟少室松高昆侖桃熟秋風蕭瑟嚴霜遽零帷
止芝朮不靈副笄在寢折筭在庭漂搖護草悽愴冬青

晚晴軒僊體文存卷一

三

嗚呼哀哉窈窕德象女師職兮禮儀法度中表式兮兢
兢內訓亞惠班兮煌煌母教圖甘泉兮雲車風馬紛來
下兮金支翠旗去安之兮靈之逝兮燕臺之隄兮靈之
歸兮孤山之陲兮絳紗隔兮音容忽兮來格來歆永無
斃兮尚饗

曹俊三 丙輝 太守崇祀名宦呈代

為公額

題請崇祀名宦以光

國典而愜輿情事竊維誦元始詔書巴郡肅文翁之祭
讀蘭臺敘傳齊東表石相之祠鑄績鍾彝升香俎豆祀

晚晴軒僊體文存卷二

泰州陳文田硯鄉

曾滌生師六十壽序

衡雲炫采瞻山靈者眷慕生申軼轂揚華景賢裔者雍容談孝伊古河書錫姓辰象降精撰洛鈐以報齊吹塵垢而涉海類皆穆天絳參化源能迴鄧林之戈自鑄博山之鼎若夫曹參代相作漢宗臣李晟天生爲唐社稷丹青易沫史臣勒景囊之鍾朝請重來天子賜靈壽之杖福兼五禮禮絕百僚其惟我滌生夫子乎夫子蚤陟承明夙勅著作文追籀古則抗跡冰斯

晚晴軒僊體文存卷一

某等博采輿歌甄詳德頌值

聖代報功之日觀

恩綸疊錫之隆卿月兼銜曜重泉而炫采儒林教胄及來葉而翔華願分

雨露之餘并補春秋之祀棠陰萬樹流風在聊攝以東香火千家正氣引星辰而上爲此具呈公舉并開列事實清冊伏乞鑒核轉詳施行

三

晚晴軒僊體文存卷二

經足苗畬則搜奇馬鄭優游林府條分中簿之藏苗藹緹油上補

起居之注由是覽錦江之春色異材畢萃於立亭策漢殿之珠囊仙筍咸羅於紫府方是時周行如砥翰海無塵人第見詔制出於常楊而不知禁署自有頗牧也今夫昆吾躍冶五金爲之掩光天驥呈材凡馬于焉息喙當潢池之聚嘯致滄海之橫流自非武庫胸羅長城坐鎮何以靖狐鳴於篝火馳鶴唳於飄風於是糾合廝與搜羅鄉校亭公督父助成墨經之威步光屈盧紛映水犀之甲過亞夫之壁壘弓韃將脫殼而迎造王濬之樓

船木梯早蔽江而下而且鑄錢銅官之浦采玉响嘯之巖上不費水衡於司農下足飽瓊靡於郢俗此卽殫陳平之計無以喻其奇出甘茂之金莫能方其利也已抑聞之批亢擣虛孫武所以解紛糾也搯吭拊背劉敬所以策全勝也不乘鄂渚以據其樞無以控上游之險不營皖山以縮其口曷由覆窮寇之巢借箸籌工舉棋局定雖復芻蕘皆盡勢詘於河陽蕙苴多訛謗騰夫新息然而江聲浩瀚英雄飲血之辰天日清明壯士張拳之候季心任俠弟亦能兵韓信無雙人皆得將卒焉合羣力下名城取若撥羣捷於燎髮風利不泊直入石頭甲

積如山高逾熊耳懿乎鏖哉莫與京已且夫持節上流告武功之大定分符南紀得善政以從風此必有陽開陰闔之權乃能兼秋肅春溫之用觀其虛牟九有經緯萬端導秦淮之流香浮茶筍開揚子之院碧潤鹽花仿李仲璇之書丹聆韋絃於鄒魯表張睢陽之殉義壯氣節於河山而且創四學以儲材孔堂同步懼五經之埽地宋槧重新此尤意在噓枯力能幹化近軼乎范韓之威望遠超乎羊杜之風流矣今

天子以功之尤也德之懋也割符世爵苴以白茅顙面正朝登之黃閣移寇恂於河內爲列侯矜式之資留溫

嶠於丹陽備前席疇咨之對則又烹鮮譚治杖鉞宣風三輔之最上陳清能厲俗五家之兵咸集安不忘危尋來脈於盧龍重輯安瀾之志感劬勞於飛雁時吟勸糴之歌

天子復以心之勤也躬之瘁也北門還鎮昇卧治以無難東澣移家抵仙居而足樂龍雲合契魚水同心自昔明良能如是乎然猶躬躬守道簡簡視身戒李徑以祛邪學槐庭之種福門多將相綜百節而周知家有韜鈴獲兩封而滋懼

賜餐十七物屢驚敕使之來樹桑八百株不假官錢之

貸况復東山賭墅太傅閒情禊日臨池右軍逸興任水寢林嬉而各得每莊襟老帶以自如斯則金釭二等之崇莫移其志而玉樹交柯之美長發其祥已師母歐陽夫人楚國名門廬陵舊系珩璜節步幼飭於公宮棗栗升階夙循夫姆教洗頌椒之豔惟吟彤管三章習被絮之常不貴花鈿九樹鏗鏘石墨寫安公德政之碑焜燿紗帷傳宋氏周官之學嬖嬖采煥少廣宮開凡柔則之風徽皆刑于之雅化也敦睦啓歲應鍾叶辰實惟夫子覽揆之吉臣逢述職九擢於東垣西垣

帝有恩言載錫以文露武露油幢風暖尙攜